

Xojon carta-la San Pablo xi kiskii-la xita naxandá-la Cristo xi títsajna nangui Galacia

Kó tsò Pablo nga síhixat'aà xita naxandá-la Cristo xi títsajna nangui Galacia

1 ¹⁻²Jñò xi naxandá-la Cristo maà xi títsajnaà ján nangui Galacia, títsanìhixot'aà-nòjen 'an xi 'mì-na Pablo, kò ngats'iì xita-la Cristo xi i títsajna-kò-na. Jè xá ítjòn xi 'an tjin-na, mìtsà it'aà ts'e xita isò'nde kitjoé-na kò mìtsà taxki xita tsibít'aà-na. Jè sobà Jesucristo kò Nainá tsibíxáya-na, jè xi Nà'èn 'mì-lá xi jè kisikjaáya-la Jesús it'aà ts'e kjoabiyaà. ³Jè Nà'èn-ná xi Nainá kò Nà'èn Jesucristo xi otíxoma-ná kàtatsjá-nò kjondaà kò kjoa'nchán ya ijiin inima-nò. ⁴Jñò, jyeé tjiin-nò nga jè Jesucristo kitsjaà kjotjò yijo-la nga k'en xi kjoa ts'e jé-ná, mé-ne nga kochrjekàjiin-ná jña kjoach'o xi tjin i isò'nde. Jesucristo, k'oaá s'ín kisikitasòn koni s'ín mejèn-la Nà'èn-ná xi Nainá. ⁵Jeya kàtijna Nainá nita mé nachrjein-ne, nita mé nó-ne. K'oa's'ín kàtama.

Tsjin ijngod-isa 'én ndaà-la Nainá xi kjoa ts'e Cristo xi kj'eif tsò

⁶'An, tà maxkón-na nga jñò, tà nitóon chinchat'aàxin-la Nainá nga kj'eif 'én tsanguit'aà-là kò kijnei takòn Nainá xi xó kiichja-nò mé-ne nga it'aà ts'e kjondaà-la Cristo sijchá yijo-nò. ⁷Tanga tsjin ijngod-isa 'én ndaà-la Nainá xi kjoa ts'e Cristo xi kj'eif tsò. Tanga tjin i'nga xita xi binchá ská-nò xi mejèn-la siikjatjya-la 'én ndaà-la Nainá xi kjoa ts'e Cristo. ⁸Tanga tsà tjin xita xi kj'eif tsò 'én xi okóya xi mì k'oaá tsò koni tsò 'én ndaà-la Nainá xi kjoa ts'e Cristo xi jin bènojmi-jen, kàtatsjá-la

kjo'in Nainá, nas'ín ti 'an-na, o nas'ín jngoò àkjale xi ngajmii nchrobá-ne kàtatsjá-najen kjo'in. ⁹Koni s'ín ki'mì-nòjen nga sa ítjòn, tákó k'oaá s'ín tìxan ìjngoò k'a-nò: Tsà yá xi kj'eíí tsò 'én xi bénojmi-nò koni tsò 'én ndaà-la Nainá xi jye kichjoétjò, Nainá kàtatsjá-la kjo'in.

Mé kjoa xi komàt'in Pablo nga it'aà ts'e Cristo kisixáya-la

¹⁰'An, mìtsà kjondaà-la xita otsjià, kjondaà-la Nainá otsjià. Mìtsà koií otsjià nga ndaà kótijna nga nguixkon xita. Tsà kos'ín s'iaàn, mì-là tsà kixi kjoa nga chi'nda-la Cristo ma.

¹¹Jñò 'ndseé kò tichjaá, k'oaá s'ín kàtasijìn-nò; jè 'én ndaà-la Nainá xi kjoa ts'e Cristo xi 'an benojmiá, mìtsà kjohítsjeèn-la xi taxki xita. ¹²Mìtsà it'aà ts'e xi taxki xita komà-na kò nga kjòchiya-na 'én koi; jè sobà Jesucristo kisihiseèn-na nga tsakóya-na.

¹³Jñò, jyeé kina'yà kó kis'iaàn nga tisa ítjòn, k'e nga ya kiit'aà-la kjotíxoma-la xita judío. 'An, tsangatjingui-la jñà xita naxandá-la Cristo nga kòjtikeè; mejèn-na nga kàtachija. ¹⁴Koni s'ín tjin kjotíxoma-la jñà xita judío, jìn jchán xita naxandá-na xi taña jchínga-jen, kisikítsajna tjingui nga 'an, isa 'nó ndaà kisikitasoàn koni s'ín tjin xkósòn xi tjin-la xita jchínga-na.

¹⁵Tanga Nainá k'oaá s'ín kisaseèn-la nga 'an jaàjìn-na k'e nga tákó ya tijnaya'ma indso'ba nea-na, nga nguì tà koò kjondaà-la nga 'an kílchja-na; ¹⁶kò kisikatsejèn-na Kí'ndí-la mé-ne koma kichjàyajiìn-la 'én ndaà-la jñà xi mìtsà xita judío. Mìtsà yá xi kiskònangui-la xi taxki xita; ¹⁷kò mìtsà ya kiaà ján naxandá Jerusalén nãnda títsajna jñà xita xi isa kjòtseé tsibíxáya-la Cristo koni 'an. Tà saá ya kiaà i'nde Arabia; xi komà iskan-ne inchrobà ìjngoò k'a-na ya naxandá Damasco.

¹⁸K'e nga jye tsato jàn nó, skanda k'eé kiaà ján Jerusalén nga mejèn-na skoexkoan Cefas [xi tikoá Pedro 'mì]; chrj'oòn naxrjein tsohótijna ya ni'ya-la. ¹⁹Xita xi kisixáya-la, mìtsà yá xi kijtseèxkoan xi kj'eíí, ta jè tajngoò Jacobo xi 'ndse ma Na'èn-ná. ²⁰Jñà 'én koi xi 'an tìsikásén-nò, nguì 'én kixi-né, tíbeè Nainá, mìtsà 'én ndiso.

²¹K'e nga jye komà iskan, kiaà ján nangui Siria kò ya nangui Cilicia. ²²Tanga jñà naxrjein koi, kj'eè kì beèxkon-na jñà xita naxandá-la Cristo xi títsajna ya nangui Judea. ²³Tà k'oaá tsò 'én xi kiinchré: “Jè xi kiitjingui kondra-ná nga sa kjòtseé,

i'ndeì, 'én ndaà-là Nainá xi kjoa ts'e Cristo chjaya, jè 'én xi mejèn-là kisichja nga sa ítjòn." ²⁴ Jñà xita koi, jeya kisikijna Nainá nga jye jahatjiya-na.

2 ¹ K'e nga jye komà iskan nga jye ijchò te ñijòn nó, kiaà ijngòd k'a ján Jerusalén kò Bernabé; tikoà kiikoà jè Tito. ² Koi kii-na nga Nainá k'oas'in kisikichiya-na nga tjínè-na nga kjíán. Jñà xita xi xá 'nga tjín-là ya naxandá-là Cristo it'aà xin tsibenojmí-là kó tsò 'én ndaà-là Nainá xi kjoa ts'e Cristo xi 'an chjaya-là jñà xi mìtsà xita judío. Majìn-na nga jñà xita koi kitso-na nga nimé chjì-là xá xi 'an tìs'iaàn kò xi jye kis'iaàn. ³ Jè Tito nas'in xita griego nga ya tjiko-na, mìtsà yá xi kjo'ño kis'iin-là nga kisit'aà chiba-là yijo-là kjoa ts'e circuncisión. ⁴ Tanga tjín i'nga xita ndiso xi jahas'en-jiin chijé nga tsò nga tikoà jè Cristo fit'aà-là; ta jè xi mejèn-là nga kotsejèn chijé kós'in tìtsa'né jñà xi mokjeiín-ná it'aà ts'e Cristo Jesús nga jye tìtsajandiaá kjoa ts'e kjotíxoma xi kitjoé-là Moisés, kò mejèn-là nga kjo'ño s'iin-ná nga sikitasoán kjotíxoma. ⁵ Tanga ngajen ni ítse kinìs'in-lajen mé-ne nga jè kjoa kixi xi ts'e 'én ndaà-là Nainá xi kjoa ts'e Cristo, yaà kàtijnajiin-nò nga kjit'aà nachrjein.

⁶ Jñà xita xi xá 'nga tjín-là nimé kjoa xitse kitsjaà-isa-na koni tsò 'én xi 'an okoòya. Tanga mìtsà 'an tjín-na kindà tsà xita ítjòn-né kò tsà majìn. Nga Nainá mìtsà faájiin xita yá-ne xi tìtsajna ítjòn kò yá-ne xi tìtsajna tjingui. ⁷ Ta saá kòkjeiín-là nga jè sobà Nainá kitsjaà-na xá nga 'an kichjàyajiin-là 'én ndaà-là Nainá xi kjoa ts'e Cristo jñà xi mìtsà xita judío xi mìkii tjít'aà chiba yijo-là kjoa ts'e circuncisión. Kò jè Pedro kitjoé-là xá nga jè kiichjàyajiin-là jñà xi nguì xita judío xi tjít'aà chiba yijo-là kjoa ts'e circuncisión. ⁸ Nainá, koni kisikò Pedro nga jè tsibíxáya-là nga kiichjàyajiin-là 'én ndaà-là Nainá xi kjoa ts'e Cristo jñà xi nguì xita judío, 'an, k'oàà tì kisikò-na nga 'aán tsibíxáya-na nga kichjàyajiin-là 'én ndaà-là Nainá xi kjoa ts'e Cristo jñà xi mìtsà xita judío.

⁹ Jacobo, Cefas [xi tikoà Pedro 'mì] kò Juan, xi kos'in beèxkón xita nga jñà tìtsajna ítjòn ya naxandá-là Cristo, kijtseè nga Nainá kitsjaà-na kjondaà koi. Kjòjngòd ikon, ikjoàn kitsjaà-najen tsja, 'an kò Bernabé, mé-ne nga ki'ya-là nga ta jngoó xá tìtsa'nè-jen. Ndaà kisaseèn-là nga tsanguì nìxá-lajen jñà xi mìtsà xita judío, koà jñà, kisixáko jñà xi nguì xita judío.

¹⁰Tà koií kjoa xi kisijé-najen nga kochj'at'aà-la xita ima. Jñà kjoa koi, tikoá 'an, jyeé kos'ín tibinè-la yijo-na nga k'oa tis'iaàn.

Mé-ne tsohótiko-ne Pedro jè Pablo ján naxandá Antioquía

¹¹Jngoò k'a k'e nga jè Cefas [xi tikoá Pedro 'mì] j'iì i naxandá Antioquía, tsakatíkoa nga nguixkon xita k'e nga kijtseè nga mikiì ndaà tjín kjoa xi tís'ín. ¹²K'e nga sa ítjòn, yaá tsakjèn-ko jñà xita-la Cristo xi mìtsà xita judío. Nga komà iskan, k'e nga j'iì xita judío xi tikoá mokjeiín-la it'aà ts'e Cristo, xita xi ts'e Jacobo, k'eé mì tì kii ya tsakjèn-ko-ne; tsasit'aaxìn-né nga majìn-la nga ch'o kijnako jñà xita koi nga kjo'nó mejèn-la nga sit'aà chiba-la jñà xi mìtsà xita judío. ¹³T'ikoá jñà xita judío xi i'nga xi mokjeiín-la 'én-la Nainá, k'oaá ti kis'iin koni jè Pedro nga kisís'in-la kjoa xi jò isén tjín-la, skanda jè Bernabé k'oaá ti kis'iin. ¹⁴'An, k'e nga kijtseè nga mì k'oaá s'ín nchisíkitasòn koni s'ín tjín kjoa kixi-la 'én ndaà-la Nainá xi kjoa ts'e Cristo, k'oaá kixan-la jè Cefas [xi tikoá Pedro 'mì] nga nguixkon ngats'iì xita: “Ngaji nga xita judío 'mì-lè, k'oaá s'ín tìnjíchi yijo-lè koni tsà mìtsà xita judío. ¿Mé-ne kjo'nó 'nè-la jñà xi mìtsà xita judío nga k'oas'ín kàtasíjchá yijo-la koni tsà nguì xita judío?”

¹⁵'Nas'ín kixi kjoa nga tje-la xita judío 'mì-ná nga mì yaá kits'iin-jiin-lá jñà xi mìtsà xita judío xi xita jé 'mì-lá, ¹⁶tanga 'ya-ná nga jñà xita, mìtsà kixi kítsajna nga nguixkon Nainá nga ta koi kjoa-la nga síkitasòn Kjotíxoma xi kitjoé-la Moisés; ta jè-né nga mokjeiín-la it'aà ts'e Cristo. Jñá, jyeé kòkjeiín-ná it'aà ts'e Jesucristo, ko jè Nainá kixi síkijna-ná koi kjoa-la nga jye ya kòkjeiín-ná it'aà ts'e Cristo, mìtsà koií kjoa-la nga nikitasoán kjotíxoma. Nijngoò xita xi kixi kijná nga nguixkon Nainá nga ta koi kjoa-la nga síkitasòn Kjotíxoma.

¹⁷I'ndeí k'oaá s'ín chiñá-lá nga kixi kitsajnaá ya nguixkon Nainá ta koií kjoa-la nga mokjeiín-ná it'aà ts'e Cristo, [mìtsà koi-ne nga kjotíxoma titsanikitasoán]. K'oaá ma-ne nga xita jé tí'mì-ná [koni jñà xi mìtsà xita judío]. Tanga, ¿a tsò-ne kjoa nga jè Cristo bí't'in-ná nga binchaàtsjiaá jé? Majìn, mì k'oaá s'ín tjín. ¹⁸Tsà jè kjotíxoma xi 'an tsachrjekànguia nga sa ítjòn, ko tsà ijngoò k'a sikitasoàn, jé tihotsjià. ¹⁹Jè kjotíxoma xi kitjoé-la Moisés, jè kisik'en-na. I'ndeí tijnandeí-ná kjoa ts'e

kjotíxoma mé-ne ma kótijnakon-na nga sikitason-la Nainá. ²⁰K'e nga k'en-t'aà krò Cristo, 'an, tikoá ya k'en-t'aakoá. Ko mìtsà tì'an-na xi tijnakoan, jè Cristo xi tijnajìn inima-na. I'ndei, koií tijnakon-na nga jè Ki'ndí-la Nainá ma'nót'aà takoàn nga 'nó kjòtsjakeè-na skanda jè kitsjaà kjotjò yijo-la nga k'en ngajo-na. ²¹Majìn-na nga ochrjekànguia kjondaà-la Nainá. Tsà it'aà ts'e kjotíxoma xi kitjoé-la Moisés, kixi kitsajnaá nga nguixkon Nainá, mì-la mé chjí-la nga k'en Cristo.

**Mé xi chjí-la, a jè kjotíxoma xi kitjoé-la Moisés,
o xi jè-né nga mokjeín-ná it'aà Cristo**

3 ¹Jñò xi nangui Galacia tsajòn, mé ta tònò-nò! ¿Yá xi kiskoònachan-nò? ¿A mì bítsjeèn-nò koni s'ín nga nguì ndaà tsibènojmiya-nòjen nga jè Jesucristo yaá k'en-t'aà krò xi kjondaà tsajòn? ²Tà koií kjoa kjònangui-nò: ¿A koií kjoa-la nga kinikitasòn kjotíxoma nga kitjoé-nò Inima Tsjeè-la Nainá, o xi koií-né nga mokjeín-nò 'én-la Nainá koni s'ín kina'yà? ³Jñò, nga sa ítjòn, tsibìts'iaqo-nò kjohítsjeèn-la Inima Tsjeè-la Nainá; ko i'ndei, mejèn-nò nga tà kjohítsjeèn-la xita sijkjehet'aà-nò. ¡Mé ta tònò-nò! ⁴Jñò, tseé kjo'in tsatojiodn nga kòkjeín-nò 'én ndaà-la Nainá. ¿A tà kjotjò-ne nga tse kjo'in tsatojiodn? Majìn, mì-la kiì ndaà tjin. ⁵K'e nga Nainá kitsjaà-nò Inima Tsjeè-la ko kis'iin kjoxxón xi ndaà tjin ijìn naxandá tsajòn, ¿mé-ne k'oas'ín kis'iin-ne? ¿A koi-né nga ndaà kinikitasòn kjotíxoma? Majìn, koií-né nga kòkjeín-nò 'én ndaà-la Nainá.

Nainá, mé-ne xita kixi kijtseè takòn-ne Abraham

⁶Koni jè xita jchínga-ná xi ki'mì Abraham kòkjeín-la it'aà ts'e Nainá; k'oaá komà-ne nga xita kixi kitsò-la Nainá. ⁷Jñò, k'oaá s'ín ndaà kàtasijìn-nò: Jñà xi mokjeín-la, jñà-né xi tje-la Abraham. ⁸Nga tisa kjòtseé, jyeé k'oas'ín kitsjaà 'én Nainá koni s'ín tíchja Xojon-la nga síkixi-né jñà xi mìtsà xita judío k'e nga mokjeín-la it'aà ts'e. Yaá tíchja nánnda jè Nainá tjen kitsjaà ítjòn-la Abraham jñà 'én ndaà-la xi tsò: “Ngats'iì naxandá xi tjin isò'nde, it'aà tsjií kochikon-t'in.” ⁹K'oaá ma-ne nga ngats'iì xita xi mokjeín-la it'aà ts'e Nainá ngàsòn kochikon-t'in ko Abraham nga jè Abraham kòkjeín-la it'aà ts'e Nainá.

¹⁰Ngats'iì xit̃a xi jè ma'nót'aà takòn koni s'ín nchisíkitasòn kjo'tíxoma, kjo'iín tjinè-la, nga mìtsà kixi kjoa nga ndaa síkitasòn ngats'iì kjoa xi ya tjit'aà. Nga k'oaá s'ín tíchja Xojon-la Nainá nga tsò: “Kàtasinè-la kjo'in jè xi mì kixi síkitasòn ngats'iì kjoa xi tjit'aà jè xojon ts'e kjo'tíxoma.”

¹¹Oki-xi-né nga nijngò xit̃a xi kixi kijná nga nguixkon Nainá nga kjo'tíxoma síkitasòn. Nga jè 'én-la Nainá tsò-né: “Jè xi xit̃a kixi, jè kjoa xi mokjeiín-la kijnakon-ne.” ¹²Jñà xit̃a xi kjo'tíxoma síkitasòn mìtsà Nainá ma'nót'aà ikon. Nga k'oaá s'ín tíchja Xojon-la Nainá, nga tsò: “Xit̃a xi kjo'tíxoma síkitasòn, k'oaá s'ín tjinè-la nga k'oas'ín siijchá yijo-la koni tsò kjo'tíxoma.”

¹³Jè Cristo tsibíchjítjì-ná kjo'in xi ya titsajnajñaá nga kjo'tíxoma titsanìkitasoán nga jè kisikjeiín kjo'in xi jé tsaján; nga k'oaá s'ín tíchja xojon nga tsò: “Kjo'iín sinè-la ngats'iì xi krò sit'aà.” ¹⁴Jè Cristo, koif okis'iin-ne mé-ne nga jñà kjoa machikon-t'in xi kitjoé-la Abraham tikoá tjoé yije-la ngats'iì naxandá xi tjin isò'nde nga jñà kjoa machikon-t'in, yaá nchrobá-ne it'aà ts'e Cristo mé-ne nga it'aà ts'e kjoa xi mokjeiín-ná, tjoé-ná Inima Tsjeè-la Nainá xi jye k'oas'ín kitsjaà tso'ba Nainá nga tsjá-ná.

Nga'nó xi tjin-la 'én-la Nainá koni s'ín kitsjaà-la tso'ba Abraham

¹⁵Jñò 'ndsè kò tichjaá, kènojmi jngòò-nò kjo'tíxoma xi ts'e isò'nde. K'e nga sindaajìin jngòò kjoa nga xojon tjami'nga, nga jye ma firma kò sasén-la sello, mì tì kii koma kits'ón-ya-ne koni s'ín sindaajìin, tikoáá mì tì kii koma siit'aàsòn-isa-la 'én xi kje'ei tsò koni s'ín jye kasindaajìin. ¹⁶K'oaá s'ín kitsjaà-la tso'ba Nainá jè Abraham kò jè xit̃a tje-la. Jè Xojon-la Nainá mìtsà tsò “jñà xit̃a tje-la”, ta tsò-né: “jè tje-lè.” Nga mìtsà kjin ma tje-la Abraham xi kitjoé-la koni tsò 'én xi kitsjaà-la Nainá, ta jngoo ma-ne. Nga jè tíhoxkit'aà Cristo. ¹⁷Jè kjoa xi tibenojmiá, kiis'ín tjin: Nainá kò Abraham tsibíndaajìin jngòò kjoa, ikjoàn kisikixiya [koni ma k'e nga jye ma firma]. K'e nga jye tsato ñijòn sindò kò katé nó, j'iì kjo'tíxoma ts'e Moisés; tanga jè kjo'tíxoma mìkii ma síkits'óna jè kjoa xi jye kisindaajìin kò mìkii ma kitjongui xi Nainá jye k'oas'ín kitsjaà tso'ba. ¹⁸Jè Nainá k'e nga tsjá-ná kjondaà-la, mìtsà koi kjoa-la nga nikitasoán kjo'tíxoma, koi-né nga jye k'oas'ín kitsjaà

tso'ba. Nga Nainá, tà kjotjò kitsjaà-la kjondaà Abraham nga jyeé k'oas'ín kitsjaà-la tso'ba.

Mé xá xi tjin-la kjotixoma

¹⁹Tanga jè kjotixoma, ¿mé xá kitjei-ne? Koif k'oas'ín kitjei-ne koif kjoa-la nga ch'o nchis'ín xita. K'oaá s'ín kisijna skanda k'e nga j'iì tje-la Abraham xi Nainá xó k'oas'ín kitsjaà-la tso'ba. Jè kjotixoma, jñà àkjale j'iiko ko jè Moisés tsasijnajiin osen nga kisikatoya 'én ko kiichjatji xita nguixkon Nainá. ²⁰K'e nga jngoò xita osijnajiin osen, mìtsà ta jngoò xita fit'aà-la, fit'aà-la ngajò. Tanga jè Nainá ta jè tajngoó kitsjaà-la 'én Abraham.

²¹Nainá, k'e nga kitsjaà kjotixoma, mìtsà kondra kii-la koni s'ín jye kitsjaà-la tso'ba Abraham. Tsà jè-la-ne kjotixoma ma-la síkítsajnakon xita, maá-la kixi kítsajna xita nga kjotixoma síkitasòn. ²²Tanga jè Xojon-la Nainá, k'oaá tsò nga ngats'iì xita saá jé títsajnajiiin. K'oaá ma-ne nga jñà xita xi mokjeiín-la it'aà ts'e Jesucristo, tjoé-la kjoabinachon xi Nainá jye k'oas'ín kitsjaà tso'ba nga tsjá-la jñà xita nga mokjeiín-la.

²³K'e nga tikj'eè f'iì jè kjoa xi mokjeiín-ná, jè kjotixoma kitsobà'nó-ná koni tsà ndayá tsibítsajna'ya-ná skanda jè nachrjein k'e nga ki'ya-la jè kjoa xi mokjeiín-ná. ²⁴Ko jè kjotixoma kisikinda-ná koni s'ín makinda jñà ixti, skanda k'e nga j'iì Cristo, mé-ne k'e nga mokjeiín-ná it'aà ts'e Cristo, kixi kítsajnaá nga nguixkon Nainá. ²⁵I'ndeji nga jye j'iì kjoa xi mokjeiín-ná, mì tì yaá títsajna'nó-ná it'aà ts'e kjotixoma.

²⁶Jñò, ngats'iodò, saá ixti-la Nainá maá koi kjoa-la nga mokjeiín-nò it'aà ts'e Cristo Jesús. ²⁷K'e nga ya títsajnakjoòkoo Cristo nga komà bautizar, k'eé jahatjiya-nò koni jngoò xita xi síkijatjiya nikje-la. Jè sobá Cristo xi komà nikje xitse-nò. ²⁸Mì tì kii mochjeén-ne nga tjájiin xita yá-né xi xita judío ko yá-né xi mìtsà xita judío, yá xi chi'nda'nó títsajna ko yá xi títsajnandeií, yá-né xi x'in ko yá-né xi chjoón. Ngats'iodò ta jngoò yijo ma-nò nga ya títsajnakjoòkoo Cristo Jesús. ²⁹Jñò, nga xita-la Cristo ma, kixií kjoa nga tje-la Abraham ma, tikoá tjoé-nò kjotjò koni s'ín kitsjaà-la tso'ba Nainá jè Abraham.

4 ¹Tikoáá kènojmi jngoò-nò kjotixoma: Jngoò ti, k'e nga tákó itsé kji, k'oaá ngaya-la koni tsà chi'nda tíjna nga kjeè tsà jè be mé tsojmi xi tjin-la na'èn-la nas'ín k'e nga koma iskan jè tjoé-la tsojmi xi tjin. ²Nga xitaá síkinda skanda k'e

nga majchínga, kò t́jín xítà xi síkindà jñà tsojmì-là skanda k'e nga kichóya nàchrjein-là koni s'ín tsibíjna chibà na'èn-la. ³Jñá xi xítà 'mì-ná, k'oaá tís'ín komàt'iaán koni mat'in jñà ìxti k'e nga tìkj'eè mokjeiín-ná it'aà ts'e Cristo nga jñà kjotíxoma xi t́jín isò'nde ñó tsatíxoma-ná koni s'ín mat'in jñà xi ch'í'nda títsajna'ñó nga mìkì t́j'nde-là nga kítsajnadeíí. ⁴Tanga k'e nga kichóya nàchrjein koni s'ín t́jindaà-là Nainá, jè Nainá kisikasén ki'ndí-là ì it'aà nangui; kò it'aà ts'e chjoón kits'iìn koni s'ín ts'iìn xi taxkì xítà isò'nde. Kò yaá kjòchájìin kjotíxoma ts'e xítà judío. ⁵K'oaá kis'iìn Nainá, mé-ne nga jè Jesucristo sìkítsajnadeíí jñà xítà xi ya títsajnajìin-ñó kjotíxoma kò mé-ne nga ngásòn skoétjò-ná Nainá nga ìxti-là komaá.

⁶Koí kjoa-là nga jye ìxti-là maá, Nainá kisikasén Iníma Tsjeè-là xi ts'e Ki'ndí-là ya ijìin iníma-ná. K'e nga nokjoát'aà-là Nainá, k'oaá tsò Iníma Tsjeè-là: “Ndí apa”, tsò-né. ⁷K'oaá ma-ne nga ì'ndeí mìtsà tì xítà ch'í'nda títsajnaá; jyeé ìxti-là Nainá 'mì-ná; kò tìk'oaá tsjá-ná Nainá ngats'iì kjotjò xi jñá tjoé-ná nga ìxti-là 'mì-ná.

**Mé-ne síkájno-ne Pablo it'aà ts'e xítà
Galacia xi mokjeiín-là 'én-là Nainá**

⁸Jñò k'e nga sa kjòtseé, k'e nga tìkj'eè yaxkon xi ngui jè sobà Nainá, ch'í'nda'ñó tsítsajnaà nga kjo'ñó-né nga jñà tsanguit'aà-là xi mìtsà kixì kjoa nga Nainá. ⁹Tanga ì'ndeí nga jye yaxkoòn xi ngui jè sobà Nainá, (tanga xi ngui kixì kjoa, jè Nainá xi jye ndaà beèxkon-nò), ¿mé-ne k'oaas'ín nìkítsjeèn-nò nga jñà onguít'aà ìjngod k'a-là jñà kjotíxoma ìma xi t́jín-nò, jè xi tsjìn-là nga'ñó, kò xi nímé chjì-là? ¿A mejèn-nò nga ya sìkítsajna'ñó ìjngod k'a-nò? ¹⁰Jñò, tákó ñó yaxkón nàchrjein ts'e s'eí, ts'e sá, kò ts'e nó. ¹¹'An, makájno-na jè xá xi kis'iaàn nga kisixájìin-nò tsà tà kjotjò-ne.

¹²'An nga jye tsohósijnat'aàxìn-là jè kjotíxoma, tìk'oaá yaá kisìngásòn-kò-nò, nga jñò, mìkì t́jìin-nò it'aà ts'e kjotíxoma. ì'ndeí k'oaá s'ín tìsijé-nò nga tìnchat'aàxìn-là kjotíxoma koni 'an jyeé tsohósijnat'aàxìn-là. Nga sa ítjòn nímé kjoa t́jín xi ch'o kinìkò-ná. ¹³Jyeé t́jìin-nò k'e nga sa kiaà ítjoàn nga kichjàyajìin-nò 'én ndaà-là Nainá xi kjoa ts'e Cristo, koí kjoa-là nga ch'in t́jín-là yijo-na. ¹⁴Jñò, mìkì

kinachrjengui-ná n̄i m̄itsà x̄in kinik̄jna-ná, n̄as'ín kjoa tsohótsji-nò nga ch'in t̄jín-la yijo-na. Tà saá kichjoétjò-ná koni jngoò àkjalē-la Nainá, koni tsà jè sobà Cristo Jesús. ¹⁵ N̄ga s̄a ítjòn, 'n̄ó tsja t̄jín-nò! I'ndeī, ¿mé xi komà-nò? K'oaá xan-nò, skanda j̄nà xkoòn mejèn kinachrje nga 'an kits'iì-ná. ¹⁶ I'ndeī, ¿a kondraá kótijnako-nò, tà koií kjoa-la nga 'én kixi benojmí-nò?

¹⁷ J̄nà x̄ita [xi mejèn-la nga k̄jot̄ixoma s̄ikitasòn], 'n̄ó bìnè-la yijo-la it'aà tsajòn, t̄anga m̄ikiì ndaà t̄jín k̄joh̄ítsjeèn-la. Tà jè xi mejèn-la nga k̄ochrjet'aàx̄in-nò it'aà tsajen mé-ne nga j̄nà konguít'aà-là. ¹⁸ J̄nò, ndaà t̄jín k'e nga 'n̄ó bìnè-là yijo-nò it'aà ts'e kjoa xi mejèn-nò tsà ndaà t̄jín k̄joh̄ítsjeèn-nò k̄o tsà k̄jit'aà n̄achrjein k'oas'ín s'een, m̄itsà tà k'e nga 'an t̄ijnako-nò. ¹⁹ J̄nò xi koni tsà ndí ixti-n̄a xan-nò, 'an, k'oaá s'ín t̄imat'ian koni jngoò chjoón xi ki'ndí tí'beé; tseé k̄jo'in t̄is̄ik̄jiaán xi kjoa tsajòn. Jè k̄jo'in xi t̄is̄ik̄jiaán skanda k'eé-la k̄joh̄et'aà k'e nga k'oas'ín s̄ijchá yijo-nò koni Cristo. ²⁰ Mejèn-na nga ya kótijnako-nò jè hora jè, mé-ne nga k̄jeíí tsò 'én xi kichjako-nò. Jyeé m̄i t̄i kiì be-na kós'ín s̄ik̄ítsjeèn it'aà tsajòn.

Kó tsòya-ne it'aà ts'e chjoón Agar ko Sara

²¹ J̄nò xi mejèn-nò nga k̄jot̄ixoma s̄ikitasòn, ¿a k̄jeé na'yà-là kó tsò 'én xi t̄jít'aà k̄jot̄ixoma-la Moisés? ²² K'oaá tsò nga jè Abraham, jò komà ixti-la, jngoò ts'e chjoón ch̄i'nda-la; jè xi ījngoò, ts'eé xi nguì chjoón-la xi m̄itsà ch̄i'nda t̄jna. ²³ Jè ki'ndí-la xi chjoón ch̄i'nda k'oaá s'ín kits'iìn koni s'ín ts'iìn ngats'iì ndí ixti. T̄anga jè ts'e xi nguì chjoón-la xi m̄itsà ch̄i'nda t̄jna, k'oaá s'ín kits'iìn nga tsitasòn koni s'ín kitsjaà-la tso'ba Nainá Abraham. ²⁴ Kjoa ts'e íchjín koi, k'oaá ngaya-la koni j̄nà kjoa xi jò tsibíndāj̄iìn Nainá. Jè chjoón Agar, jè ngaya-la kjoa xi kisindāj̄iìn ya nindoò Sinaí k'e nga kitjoé-la k̄jot̄ixoma Moisés. Ngats'iì x̄ita t̄je-la ch̄i'ndaá tsib̄itsajna. ²⁵ Jè chjoón Agar, jè ngaya-la nindoò Sinaí xi s̄ijna ján Arabia, k̄o n̄achrjein i'ndeī jè mangásòn-k̄o n̄axandá Jerusalén, nga j̄nà x̄ita-la ch̄i'nda'n̄ó t̄ítsajna nga tákó k̄jot̄ixoma s̄is'in-la. ²⁶ T̄anga jè Jerusalén xi kijna ngajm̄i, t̄ijnandeíí-né k̄o yaá nokjoá-ná ya n̄axandá jè; k'oaá ngaya-la koni tsà nea-ná ma. ²⁷ K'oaá tsò Xojon-la Nainá nga tsò:

Kàtatsja-lè ngaji xi chjoón 'ndi 'mì-lè nga tsjìn-lè ixti.

'Nó chihindáyí nga kò kjòtsja-lè nga mìkiì 'yi kós'ín ma nga ts'iìn ixti.

Nga jè chjoón xi kijnei takòn,

isaá kjìn koma ixti-la mì k'oa-ne jè xi tjín-la x'in.

²⁸ Isaac k'oaá s'ín kits'iìn koni s'ín kitsjaà tso'ba Nainá. Jñò tìkooá ixti-laá maá xita jchínga-la Isaac koni s'ín kitsjaà-la tso'ba Nainá. ²⁹ Jè ki'ndí xi tà k'oas'ín kits'iìn koni ts'iìn yije xita isò'nde, kiitjingui kondra-la jè xi it'aà ts'e Inima Tsjeè-la Nainá kits'iìn-ne. Koni s'ín komà jñà nàchrjein koi, tákó k'oaá s'ín ma skanda nàchrjein i'ndeí. ³⁰ Tanga, ¿kó tsò Xojon-la Nainá? K'oaá tsò: “Tiyótjingui-la jè chjoón chi'nda kò ki'ndí-la; nga jè ki'ndí-la nímé kjotjò tjoé-la, tà jè tjoé-la kjotjò jè ki'ndí-la xi mìtsà chjoón chi'nda.” ³¹ Jñò ndí 'ndsè kò ndí tichjaá, k'oaá s'ín tjín, jñá mìtsà ixti-la chjoón chi'nda maá, jñá-ná xi ixti-la chjoón xi mìtsà chi'nda tjina.

Kós'ín sijchá yijo-ná nga jye titsajnandiaá

it'aà ts'e kjotíxoma xi kitjoé-la Moisés

5 ¹ Jè Cristo, jngod k'aá kisikítsajnandeí-ná it'aà ts'e kjotíxoma xi kitjoé-la Moisés; k'oaá ma-ne jñò 'ñó kixi titsajna koni s'ín kisikítsajnandeí-nò Jesucristo. Kì tì ya onguít'aà-là kjoa ts'e kjotíxoma xi kitsobà'ñó-nò skanda kjòtseé.

² An sobá-ná xi 'mì-na Pablo, tiná'ya-ná koni xan-nò: tsà sit'aà chiba-nò kjoa ts'e circuncisión, mì tì mé kjondaà sakò-nò it'aà ts'e Cristo. ³ Jngod k'a koxan-nò, nita yá xita-ne xi sit'aà chiba-la kjoa ts'e circuncisión, kjo'ñó tjínè-la nga siikitason yije koni tsò 'én xi tjít'aà xojon ts'e kjotíxoma. ⁴ Jñò xi k'oas'ín mejèn-nò nga it'aà ts'e kjotíxoma kixi kitsajnaà nga nguixkon Nainá, jyeé chinchat'aaxìn-là Cristo, jyeé chinchat'aaxìn-là kjondaà xi tsjá kjotjò-ná Nainá. ⁵ Tanga ngajen, it'aà ts'e Inima Tsjeè-la Nainá titsachiñá-lajen nga kixi kitsajna-jen nga nguixkon Nainá nga ta koi kjoa-la nga mokjeiín-najen it'aà ts'e Cristo. ⁶ Nga it'aà ts'e Cristo Jesús, mì tì mé chjí-la yá-ne xi tjít'aà chiba-la kò yá-ne xi tsjìn-la chiba kjoa ts'e circuncisión. Jè xi chjí-la nga 'ya-la koni s'ín mokjeiín-ná it'aà ts'e Cristo, nga tjín-ná kjotsjacha.

⁷Jñò, k'e nga sa ítjòn, ndaà tìtsahonguíkoo kjohítsjeèn-nò. ¿Yá xi tsatekjáya-nò nga mì tì kii ñikitasòn-nò xi kjoa kixi? ⁸Jè kjohítsjeèn jè, mìtsà ya nchrobá-ne ts'e Nainá xi xó kiichja-nò. ⁹Tìkindaa yijo-nò; nga k'oaá tsò jngod'én: "Nas'ín itsé-ne na'yo san xi sijiin na'yo inchrájin, sísan yije-né nas'ín tse ma-ne na'yo." ¹⁰Jè Nainá ot'aà takoàn it'aà tsajòn nga mìtsà kj'eíi s'ín sikítsjeèn. Jè Nainá tsjá-la kjo'in nita yá xita-ne xi mejèn-la sikits'ón-jiiin-nò.

¹¹Jñò ndí 'ndsè kò ndí tichjaá, nga mì k'oaá s'ín tihokoòya nga sit'aà chiba-la xita kjoa ts'e circuncisión, koií kjoa-la nga fitjingui kondra-na jña xita. Tanga tsà mì k'oas'ín okoòya, mì-la kii kjitjingui kondra-na, mì-la tì kii kojtikeyè-ne 'én xi chjaya it'aà ts'e krò-la Cristo. ¹²Jña xita xi mejèn-la sikits'ón-jiiin-nò, kì tà bí't'aà chiba-la yijo-la, ta saà jngod' k'a kàtatet'aà yijo-la.

¹³Jñò 'ndseé kò tichjaá, k'oaá s'ín kiichja-nò Nainá nga kitsajnandeíi-nó it'aà ts'e kjotixoma. Tanga i'ndeíi nga tìtsajnandeíi-nó, kì ch'o 'nè koni s'ín mejèn-la yijo-nò. Mochjeén-né nga tìsikòò xinguiòò, kàtas'e-nò kjotjòcha nga ijngod' ijngod'-nò. ¹⁴Nga ngats'iì kjotixoma, yaá majngod' yije jè xi tsò: "Tìtsjachi xita xinguii koni tsà tì yijo tsiji-ne." ¹⁵Tsà tijnò tìtsabixkàn-kò-nò xinguiòò koni s'ín nañá, t'een kinda yijo-nò nga mì tijnò sikjehesòn-nò xita xinguiòò.

Kjoach'o xi síjé yijo-ná

¹⁶K'oaá xan-nò: Tjii'nde-la yijo-nò nga jè Inima Tsjeè-la Nainá kàtakó-nò ndiyá mé-ne nga mì koi kjoa sikitasòn kjoach'o xi síjé yijo-nò. ¹⁷Jña kjoach'o xi síjé yijo-ná kondraá fi-la jè Inima Tsjeè-la Nainá, kò jè kjoa xi mejèn-la Inima Tsjeè-la Nainá kondraá fi-la jè xi mejèn-la yijo-ná. Jña kjoa koi kondraá tìtsajna-la xíkjin. K'oaá ma-ne nga jñò, mìkii k'oas'ín s'een koni s'ín mejèn-nò. ¹⁸Tanga tsà jè Inima Tsjeè-la Nainá tìhokó-nò ndiyá, mì tije kjotixoma otixoma-nò.

¹⁹Jyeé 'yaá mé kjoach'o xi síjé yijo-ná koni jè kjoachijngui, kjoaxòpa, kjoachinga, ²⁰kjoa nga xkòsòn yaxkoán, kjoatje, kjoa nga majticháá xinguiáá, nga bixkán-koaá xinguiáá, nga machinichaá xinguiáá, nga jti takoán, nga nachrjenguiáá xinguiáá, nga xita ñijòyaá kò nga binchat'aàxìn-lá xinguiáá, ²¹kjoaxitàkòn, kjoach'i, kò ngats'iì kjoachrjá'a xi ma ñánda

bitjo s'eí. Tjín ìsa kjoa xi kjeí, xi mangásòn-kò kjoa koi. Koni s'ín kixan-nò nga sa ítòn, tákó k'oaá xan-nò skanda i'ndeí, jñà xita xi k'oa tjín kjoa xi s'ín, nímé kjondaà sakò-la ya ñánda nga tíhotíxoma Nainá.

Kjondaà xi tsjá Iníma Tsjeè-la Nainá

²²Tanga jñà kjondaà xi tsjá Iníma Tsjeè-la Nainá, jñà-né nga tjòcha s'eén xinguiáá, nga tsja s'en kjit'aá, nga 'nchán sijchá yijo-ná, nga s'e-ná kjoatsejta, nga tsjakjoa s'eén, nga s'en-ná kjondaà xi ndaà tjín, nga kixi tjín kjohítsjeèn-ná, ²³nga indaàkjoa s'eén kò nga kixi kotíxoma-lá yijo-ná. Jñà kjoa koi, tsjín kjotíxoma xi kondra tíjna-la. ²⁴Jñà xi jye xita-la Cristo maá, ngats'iì kjohítsjeèn-ná xi ch'o tsò kò xi ch'o síjé yijo-ná, yaá kinik'en-t'aá krò-la Cristo. ²⁵I'ndeí nga jè Iníma Tsjeè-la Nainá tísikíjnakon-ná, mochjeén-né nga kòs'ín kjaán koni s'ín okó-ná ndiyá. ²⁶Mìkiì ndaà tjín nga 'nga koma takoán, nga tijñá sijiti-lá xinguiáá, kò nga koxítakòn-chaá xinguiáá.

Mé xi mochjeén nga ndaà sikoáá ngats'iì xita

6 ¹Jñò ndí 'ndsè kò ndí tichjaá, tsà tjín i'nga xita xi jé ótsji, jñò xi ndaà onguít'aà-là jè Iníma Tsjeè-la Nainá, jñò tísikòè nga kàtakixiya ìjngòè k'a-ne nga indaàkjoa tinókjoa-la. Tanga jñò, t'een kindà yijo-nò, mé-ne nga mì jé skajiìn-nò. ²Tísikòè xinguiò k'e nga tsà mé kjoa xi 'in tjín títajajjìn; k'oaá s'ín koma-ne nga sikitason jè kjotíxoma xi kitsjaà Cristo. ³Tsà tjín i'nga xita xi ndaà ochrjengui yijo-la, koa tsà mìtsà kixi-ne kjoa, jñà xita koi, tà yijo-laá nchikonachan-la. ⁴Ìsaá ndaà-ne nga chít'aà yijo-nò nga jngòè ìjngòè-nò, a ndaà títas'nè; tsà ndaà títas'nè, ta ya tíjìn takòn, kì k'oaá s'ín nìkítsjeèn nga jñò, isaá ndaà títas'nè mì k'oa-ne koni jñà xita xi kjeí. ⁵Nga jngòè ìjngòè, yaá kjinè-la kòs'ín tísijchá yijo-la. ⁶Jñà xita xi nchikota'ya 'én ndaà-la Nainá, mochjeén-né nga kàtatsjá-la mé xi kochjeén-la maestro-la nga 'én okóya. ⁷Kì yijo-nò chonachan-là; nga Nainá mìkiì koma siskákoáá. Nga ìjngòè ìjngòè xita, koni tjín kjoa xi s'ín, k'oaá tì tjín kjoa xi sakò-la. ⁸Nga jè xi k'oas'ín s'ín koni s'ín mejèn-la yijo-la, kjoabiyaá tjoé-la it'aà ts'e kjoa ch'o xi síjé yijo-la, tanga jè xi k'oas'ín s'ín koni s'ín mejèn-la Iníma Tsjeè-la Nainá, it'aà ts'e Iníma Tsjeè-la Nainá tjoé-la kjoabinachon xi mìkiì fehet'aà

nita kjé-né. ⁹Mikii ndaà tjin tsà kosii-ná nga ndaà s'eén; nga kijchò nchrjein nga sakò-ná kjondaà tsà mì kì sikhindaà-lá takoán. ¹⁰Koií kjoa-la, k'e ma xi 'né itsé, ndaà sikoáá ngats'iì xita, jñà títsajna ítjòn jñà xita xinguiáá xi ngásòn mokjeiín-ná 'én-la Nainá.

Mé kjoa xi síkijna ítjòn Pablo

¹¹Chítsejèn-là tsí kitsian-ne letra xi ndsaa tikjiì-nò. ¹²Jñà xita xi mejèn-la nga kjo'ño s'in-nò nga sit'aà chiba-nò kjoa ts'e circuncisión, tà koií xi mejèn-la nga ndaà síkítsajna yijo-la nga nguixkon xita; kò majìn-la nga xita kjitjingui kondra-la tsà kos'ín keènojmiya nga ya k'en-t'aà krò Cristo. ¹³Jñà xita xi tjit'aà chiba-la kjoa ts'e circuncisión, tikoáá mikii síkitasòn kjo'tixoma, tanga mejèn-la nga sit'aà chiba-nò mé-ne nga it'aà tsajòn ndaà síkítsajna-ne yijo-la k'e nga skoe nga jñò jye tjit'aà chiba-nò. ¹⁴Tanga 'an, nímé kjoa xi mejèn-na nga ndaà síkijna yijo-na; ta jè tajngoó krò-la Na'èn-ná Jesucristo nga ndaà síkijna yijo-na. K'oaá ma-ne nga jñà kjoa ch'o xi tjin isò'nde, it'aà ts'an, títsajnak'en-né kò 'an tijnak'eén-la jè isò'nde. Mì tì k'oaá tjin kjoa xi sis'in-na. ¹⁵Xi it'aà ts'e Cristo, mìtsà jè xi chjí-la tsà tjit'aà chiba-ná kò tsà tsjin-ná chiba kjoa ts'e circuncisión; jè xi chjí-la nga jè Nainá jyeé kisikjatjìya-ná kò jyeé xita xitse kjoán. ¹⁶Kàtas'e-la kjoa'nchán kò kjoa ima takòn ya jjiìn inima-la ngats'iì xita xi k'oas'ín nchisíkitasòn koni tsò 'én jè; jñà-né xi xita-la Nainá ts'e naxandá Israel.

¹⁷K'oaá ma-ne i'ndeì, kì tì yá xi kjoa ótsji-isa-na nga jyeé tjit'aà chiba-la yijo-na kjo'in xi kitsjaà-na xita xi kjoa ts'e Na'èn-ná Jesús.

¹⁸Jñò ndí 'ndsè kò ndí tichjaá, jè kàtasijiìn inima-nò kjondaà-la Jesucristo xi otixoma-ná. K'oas'ín kàtama.